


Espectaculo den Aire Liber den cuadra di apertura oficial di Museo Arqueologico Nacional Aruba



ORANJESTAD (AAN):— Preparacionnan ta den full swing pa e apertura oficial di Museo Arqueologico Nacional Aruba cu ta tuma lugar dia 26 di juni 2009. Danki na e confianza y financiamento di Fondo Europeo pa Desaroyo, Gobierno di Aruba y UNOCA, Aruba por conta cu un museo arqueologico hopi bunita mes, cu ta di gran balor historico pa Aruba, pa su hendenan y pa su Cultura.

Parti grandi di e apertura oficial lo ta encera un espectaculo den aire liber cu lo tuma lugar ariba e plench di lanti di e museo. E show aki lo ta relaciona cu e weganan di Reino Cultural y ta un regalo di Hulanda. Meta di e Weganan di Reino Cultural ta pa fortifica lasonan den Reino por medio di Cultura. Actualmente ta na Aruba Sr. Arthur de Bussy cu di parti di Hulanda ta encarga cu henter e show den aire liber. E show lo ta bou guia di e regisor for di Hulanda, Aike Dirkzwager, conhuntamente cu e regisor di Aruba, Takhai Mohamed.

Sr. Dirkzwager ta un regisor masha conoci na Hulanda, specialmente pa su show den aire liber y conhuntamente cu Takhai Mohamed y e elenco lo brinda henter Aruba un anochi inolvidable. E elenco ta consisti di diferente actor y artistanan for di diferente

parti di Reino Hulandes. Diferente di nan ta na Aruba actualmente pa prepara pa e show. Por menciona entre otro: Jackie Bernabela (Bonaire), Roy Colastica (Corsow), Priscilla Maria (Corsow), Roly Kelkboom (Corsow), Urmayn Dormoy (St. Maarten) y for di Aruba nos orguyo Alydia Wever. Tambe ta cu placer y orguyo pa por menciona cu e Maestro Dirigente di koor di Aruba, Sr. Rufo Odor tambe lo forma parti di e show. No por ke-la sin menciona cu lo tin musica y efecionan special door di e grupo Datapanik cu tambe lo ta parti di e espectaculo grandi aki.

Un y tur ta bon bini pa mira e

tremendo show aki y goza di e diferente actividadnan cu lo tuma lugar durante e apertura oficial. Lo bay tin suficiente lugar pa hende sinta y entrada pa cu henter e apertura cu lo tuma ariba e plench ta completamente gratis.

E siman despues di e apertura oficial, cual ta dianan 27 - 31 juli 2009, lo ta yena cu diferente actividadnan manera un debate di Reino, workshops, presentacionnan di buki, diferente lectura, programanan special pa mucha y hopi mas. Na caminda pa e apertura oficial mas informacion lo wordo publica relaciona cu cada dia di e actividadnan aki.

Telefonan di DIARIO
582-6747 / Fax: 582-8551